

平
津
讀
碑
記

平津讀碑記卷七

唐

憫忠寺寶塔頌

至德二載

卷之七

右憫忠寺寶塔頌在京師憫忠寺舊唐書史思明傳稱思明來降肅宗大悅封歸義王范陽長史御史大夫肅宗本紀思明之降在至德二載十二月己丑此頌建于至德二載十一月十五日己稱御史大夫史思明則御史大夫當亦安祿山僞授所有肅宗本紀至德三載正月戊寅上皇御宣政殿冊皇帝尊號曰光天文武大聖孝感皇帝此頌已稱大唐光天大聖

孝感皇帝史思明傳亦云未降之前耿仁智謂思明曰今聞孝感皇帝聰明勇智本紀以爲三載上尊號者疑史誤顧亭林以爲思明誅後重刻非也

緡雲縣城隍廟記

乾元二年七月

右緡雲縣城隍廟記在緡雲縣李陽冰篆書乾元二年陽冰爲緡雲縣令禱雨有應因遷廟於西山之巔撰此碑石久斷裂宋宣和五年十月縣令吳延年得紙本重刻此碑有題字記其旁

華嶽丘據題名

寶應二年六月

右華嶽丘據題名在華陰縣文云陳鄭澤潞等州節度行軍司馬殿中侍御史丘據再隨使主赴上都朝

謁往來皆虔拜神祠時寶應二年六月八日記舊唐書本紀寶應二年六月癸酉朔癸未以陳鄭澤潞節度使李抱玉檢校司空封武威郡王據所謂使主者卽李抱玉也李抱玉以六月八日過華陰嶽廟十一日癸未至京拜檢校司空亦與史合

贈工部尚書臧懷恪碑

廣德元年十月

右贈工部尚書臧懷恪碑在三原縣碑爲顏魯公撰書魯公文集中載此碑父德集本作父善德文苑英華載李邕臧懷亮碑懷亮爲懷恪第二兄亦云考德與碑同集本與紉宗碑臧希晏碑俱作善德者疑從後改也子崇仁府折衝希崇新唐書地理志無崇仁

府臧懷亮碑又有鴻州長道府懷州南陽府景福府
雍州通樂府史皆不書

顏魯公與郭僕射書

右顏魯公與郭僕射書在西安府學宮卽所謂爭坐
位帖也觀前書知唐時班次宰相御史大夫兩省五
品以上供奉官自爲一行十二衛大將軍次之三師
三公令僕少師保傅尙書左右丞侍郎自爲一行九
卿三監對之其勲官使職皆以本官入班自李輔國
倚承恩澤徑居左右僕射及三公之上魚朝恩復踵
行之而舊班始亂後書言僕射不當擠排尙書使居
下坐隋以前尙書僕射並是二品故舊班三師三公

尙書令左右僕射三少尙書左右丞侍郎爲一行長
安以前尙書左右僕射並是宰相景雲以後始空除
左右僕射亦有帶平章事者在侍中中書令之間故
列曹尙書皆不敢抗禮亦其勢然也

贈太保郭敬之家廟碑并陰

廣德二年十一月

右贈太保郭敬之家廟碑在陝西布政司署中敬之
汾陽王郭子儀父元和姓纂郭榮生福善榮弟弘道
生敬君廣慶廣慶生昶汾陽王子儀云榮叔父進之
後進曾孫通生敬之碑則履球生昶昶生通通生敬
之與姓纂少異通爲進曾孫則履球卽進子新唐書
宰相世系表進下空一格者誤也碑陰城臯府地理

志作成臯

左武衛大將軍白道生碑

永泰元年三月

右左武衛大將軍白道生碑在咸寧縣道生南陽郡王白元光父碑稱道生爲寧朔州刺史兼部落主捍邊卅餘載終于左衛大將軍春秋六十不書其卒之年文苑英華有此碑其子元光歷官碑字多泐以英華校之知爲朔方先鋒使同節度副使開府儀同三司試太子詹事左武衛大將軍上柱國南陽郡王其爲同節度副使開府儀同三司左武衛大將軍上柱國新唐書白元光傳皆不書

怡亭銘

永泰元年五月

右怡亭銘在武昌縣北觀音巖水中銘序李陽冰篆
銘以下并年月李莒八分李華集中有與弟莒書一
首史稱李華趙郡贊皇人此題隴西李莒其郡望也

陽華巖銘

永泰二年五月

右陽華巖銘在祁陽縣元結撰瞿令問依石經三體
書之結集中有此文字多譌外當以碑爲正古文以
譌爲清以鍾爲暉以𡗗爲尤以𡗗爲節以𡗗爲將以
𡗗爲官俱見于汗簡以𡗗爲戲从邑非戲字

成德軍節度使李寶臣碑

永泰二年七月

右成德軍節度使李寶臣碑在正定府舊察院署碑
稱壬寅歲寶應皇帝嗣位我亞相張公忠志

即李寶臣率

東諸侯復命授恒州刺史不稱寶應年號其下稱公
牧恒元年又有惟二年惟三年口四年惟五年惟六
年惟七年惟八年皆自以方鎮紀年不用廣德永泰
年號大書刻石當日之跋扈可知矣

崑臺銘

大歷二年六月

右崑臺銘在祁陽縣不題篆書人名審其筆迹與陽
華巖銘篆法相同當亦瞿令問所書文云左屬回鮮
爾雅小山別大山鮮釋文引李巡云大山少故曰鮮
毛詩公劉傳嶽小山別於大山也古與嶽字通用

會善寺戒壇牒

大歷二年十一月

右會善寺戒壇牒在登封縣會善寺前僧義辨乞還

神王師子狀上於東都故末稱謹詣光政門奉狀陳
請以聞此則上於京師故末稱謹詣右銀臺門奉表
陳謝以聞唐六典紫宸殿之東曰左銀臺門西曰右
銀臺門元稹詩當年出入右銀臺每怪春風例早迴
李商隱詩右銀臺路雪三尺鳳詔裁成當直歸皆謂
此金石萃編以東內苑北之銀臺門當之非也

李氏三墳記

大歷二年

右李氏三墳記在西安府學宮碑爲李季卿述葬其
兄曜卿叔卿春卿三墳李陽冰篆書叔卿之叔春卿
之春碑字已泐金石錄寶刻叢編有之訊之逢占穆
天子傳天子獵于萃澤其卦遇訟逢公占之漢書東

方朔傳贊朔之詼諧逢占射覆逢占二字本此

李氏栖先塋記

大歷二年

右李氏栖先塋記在西安府學宮題嗣子季卿述從子陽冰書子季卿三字已泐亦寶刻叢編有之此碑爲宋大中祥符中重開故字體不及三墳記金石萃編拓本廼口卜郃城左口口右諦視卜上是虔字左下是時字

謙卦碑

右謙卦碑在蕪湖縣李陽冰篆書字重見者皆以別體書之謙謙君子上謙字汗簡云見尙書謙尊而光而字汗簡云出王庶子碑勞謙君子君字汗簡云孫

强集字此皆與之同以此知少溫之不妥作

義琬禪師墓誌銘

大歷三年二月

右義琬禪師墓誌銘在洛陽縣乾元寺誌稱禪師諱
義琬字思靖俗姓張氏中書令汾陽郡王郭公表請
賜大演禪師又云請号焚葬借威儀所由檢校靈都
觀張尊師碑云詔爲道門威儀使劉尊師碑亦云道
門威儀使釋道俱有威儀使兩唐書職官志百官志
俱不載誌前題唐故張禪師禪師稱姓亦始見于此
碑

浯溪銘

右浯溪銘在祁陽縣銘後有釋文并權克謹等題名

次山集中有此文淵回傍山集本作淵洄巉巉多石
集本作雙石臨淵斷崖集本作斷岸隔溪絕壁集本
作夾溪將老於茲集本作茲地釋文惟斷崖作斷岑
餘俱與集本同

唐廩銘

大歷三年閏六月

右唐廩銘在祁陽縣次山集中無此文錢辛楣少詹
謂碑書厭爲冒蓋取省文但厭當从甘此却从白未
合六書之旨諦視此碑冒字七見皆从甘少詹之言
蓋失之或釋謂此可信作謗此可伯亦非

大證禪師碑

大歷四年三月

右大證禪師碑在登封縣嵩嶽寺碑爲齊國公王綽

撰結銜稱門下侍郎平章事太清太微宮使崇玄弘
文館大學士唐會要天寶元年九月勅玄元宮在京
者改爲太清宮在東都者改爲太微宮二年三月勅
兩京玄元宮宜委崇玄館大學士都檢校新唐書宰
相表興元元年李勉加太清宮使盧翰加太微宮使
並宰相之職與此碑結銜合

同州西河縣丞趙叡冲碑

大歷四年五月

右同州西河縣丞趙叡冲碑在虞鄉縣碑稱叡冲爲
隋員外郎散騎常侍平東將軍渭源公顯和之玄孫
開府儀同三司博州刺史世立之曾孫皇朝監察御
史君煦之孫統王府法曹叅軍徵之子叡冲天後時

應明堂大禮科授陝州陝縣尉終同州西河丞二子
良器良弼良器中書舍人良弼陝華等七州刺史御
史中丞浙東嶺南兩道節度使太子賓客孫密邕薰
復縱袞等咸擅才業宦成三署兩唐書皆無傳元和
姓纂唐監察御史趙君煦曾孫良器良弼良器中書
舍人生密邕薰復縱袞密檢校戶部員外郎都水使
者河南少尹復中書舍人縱戶部侍郎姓纂中書舍
人上脫良器二字又寫邕爲邑薰爲董皆字之譌

福興寺碑

大歷五年六月

右福興寺碑在上元縣銅井村此碑始見于復齋碑
錄前題尙書金部郎中兼侍御史上柱國潁川許登

撰近人釋本登字皆泐此諦視之尙可辨碑云我天寶之末乾柱寢折有生逆節乘豐江淮乾元中暴兵至於金陵此當指劉展舊唐書肅宗本紀乾元三年十一月乙丑宋州刺史劉展赴鎮楊州楊州長史鄧景山以兵拒之爲展所敗展進陷楊潤昇等州但是年閏四月己卯己改乾元爲上元而碑猶稱乾元中疑誤也

華嶽蘇敦等題名 大歷五年

右華嶽蘇敦等題名在華陰縣前題洛州司馬蘇敦弟華陰縣令發弟咸陽縣主簿敦弟前華原縣丞徹弟太常主簿徹弟吏部常選礪弟少府監主簿教弟

儼時年十二後題大歷中發任華陰縣令時禮部尙書河東裴公出牧鄱陽敦與發徹同送至此拜謁金天便過東驛末題五年夏六月五日新唐書宰相世系表蘇頲八世孫敦發教徹璲政儼璲卽儼政卽儼又不書敘前後失次不書官爵當以此碑正之舊唐書代宗本紀大歷五年五月庚辰貶禮部尙書裴士淹爲處州刺史戶部侍郎第五琦爲饒州刺史此所稱河東裴公卽士淹當貶饒州而云處州者疑史誤或後所改命也

龔丘縣令庾賁德政頌

大歷五年九月

右龔丘縣令庾賁德政頌在寧陽縣李陽冰篆書本

歷五年九月三日建此木爲金貞元三年龔丘縣令
宋佑之重刻趙明誠金石錄庾公德政碑有陰重摹
時已佚之矣

左金吾衛將軍臧希晏碑

大歷五年十月

右左金吾衛將軍臧希晏碑在三原縣希晏爲懷恪
第六子碑前題張孚撰韓秀弼書結銜俱可辨元和
姓纂禮部員外郎韓擇木生秀榮秀實秀弼秀弼國
子司業秀實太子中允墨池編載秀弼八分六碑鄭
樵金石略載秀實八分二碑寶刻類編載秀榮八分
五碑秀弼爲擇木之子其兄弟以八分擅名也宜哉

大唐中興頌

大歷六年六月

右大唐中興頌在祁陽縣浯溪石崖唐文粹載此頌以今拓本校之爲悞爲妖文粹刊本悞作昏千麾萬旗刊本万作萬復復指期刊本復復作復服蠲除祆災刊本祆作妖凶徒逆儔刊本逆作逆復復見漢書金石文字記已言之禮記大學篇逆諸四夷釋文引皇注逆猶屏也文選注引字書逆散也刊本作逆儔誤

觀身經銘碑

大歷六年十月

右觀身經銘碑在富平縣美原鎮前刻清淨智慧觀身經銘題三皇內景弟子永仙觀主兼檢校奉先口口威儀田名德集晉右軍王羲之書後刻大唐京兆

府美原縣永仙觀碑文題朝散大夫兼丹州別駕
柱國蘭陵蕭森字從政撰并模集王右軍書永仙觀
碑卽頌田名德尊師而作碑稱天寶二年時縣令河
東柳升新唐書宰相世系表柳升長安令柳洽之孫
尚書右丞相文貞公宋璟碑

大歷七年九月

右尚書右丞相文貞公宋璟碑在沙河縣碑爲顏魯
公撰書碑載璟轉廣州都督充按察經略討擊使燕
國公張說嘗爲碑頌見說集中題作嶺南按察五府
經略使與舊唐書宋璟傳同碑側亦魯公撰書記璟
遺事并立碑始末稱開元末安西都護趙含章冒干
貨賄多以金帛賂朝廷之士其後節度范陽元和姓

纂范陽節度使趙含章醴泉人

八關齋會報德記 大歷七年

右八關齋會報德記在歸德府南門亭內記本宋州刺史徐向爲河南節度使田神功寢疾祈禳報德而作新唐書田神功傳亦載其事徐向字文伯衢江陳潁鄭宋六州刺史見宰相世系表

容州都督元結碑 大歷七年十一月

右容州都督元結碑在魯山縣學宮碑稱結嘗著說楚賦三篇肅宗欲幸河東獻時議三篇家于武昌之樊口著自釋以見意今皆存集中猗玗子三篇漫說七篇漫記十篇集中無之

錢塘縣丞殷府君夫人顏氏碑

右錢塘縣丞殷府君夫人顏氏碑在河南府玉虛觀碑稱夫人爲秦王記室思魯之曾孫曹王侍讀昭甫之女秘書監元孫太子少保惟貞之姊以合狐傭所撰顏魯公神道碑攷之魯公考惟貞祖昭甫夫人爲魯公之姑故碑前魯公結銜稱第十三姪男殷府君名已泐魯公先妣太夫人殷氏爲吳縣令子敬之女秘書省學士踐猷之妹未知殷府君爲何人

黃石公祠記并陰

大歷八年七月

右黃石公祠記在東阿縣穀城山碑叙天寶歲夏六月旱甚太守河東裴公禱雨于祠有應布衣趙郡李

名年譜前卷七
卓爲撰此記碑陰稱玄宗季季濟陽廢而東平兼領之所稱河東裴公卽故郡守名序所題趙郡李卓卽今臺長栖筠然則裴序所官尙是濟陽太守在天寶十三載以前舊唐書玄宗本紀天寶六載自五月不雨至秋七月庚寅始雨濟陽之旱亦當在此歲栖筠以大歷十一年二月辛亥卒本傳年五十八天寶六載年二十九

華嶽元澄等題名

大歷八年十二月

右華嶽元澄等題名在華陰縣題稱尙書虞部員外郎兼殿中侍御史元澄元和姓纂元澄遂州刺史

文宣王廟新門記并陰

大歷八年十二月

右文宣王廟新門記在曲阜縣孔子廟題前義王府
倉曹叅軍裴平下丹篆額黃石公祠記亦裴平書題
前試義王府倉曹叅軍此無試字舊唐書義王玳玄
宗第二十四子初名濯開元十三年三月封爲義王
碑陰有充海沂密等州節度觀察使兼御史大夫鄭
漢璋咸通九年八月廿九日題字新唐書方鎮表元
和十四年置沂海觀察使領沂海兗密四州治沂州
長慶元年升沂海觀察使爲節度使徙治兗州碑所
題與表合

干祿字書

大歷九年正月

右干祿字書在潼川府顏元孫結銜稱滌沂豪三州

刺史與顏氏家廟碑同舊唐書元孫附見其子杲卿傳稱歷亳州刺史卒亳州卽豪州之譌亦豪字不從水之一證

趙州刺史何公德政碑

大歷九年七月

右趙州刺史何公德政碑在趙州碑云惟六祀大鴻臚何公再踐諸侯奉若神明尹茲趙人又云恒之伯受鉞統牧實旌異政俾幕賓膳部員外郎兼侍御史王公載揚休烈垂裕長世是時恒伯爲李寶臣寶臣自以收恒紀年不用天子年號故稱惟六祀與前李寶臣碑正同碑字完好而不書何公之名亦撰碑者之失

贈兵部尙書清源公王忠嗣碑 大歷十年四月

右贈兵部尙書清源公王忠嗣碑在渭南縣鄉賢祠
忠嗣兩唐書有傳碑云杜希望之韓鹽泉也戎侵宇
下三帥受擒公獨潰堅圍護經時之板築舊唐書吐
蕃傳杜希望爲隴右節度使王昊爲益州長史劍南
節度使分道經略以討吐蕃開元二十六年四月杜
希望率衆攻吐蕃新城拔之七月又奪吐蕃河橋於
河左築鹽泉城因於鹽泉城置鎮西軍王昊又於安
戎城左右築兩城九月吐蕃大下官軍大敗兩城並
爲賊所陷將士已下數萬人及軍糧資仗並沒于賊
碑所述卽其事

真化寺尼如願律師墓志銘 大歷十年七月

右真化寺尼如願律師墓志銘在咸陽縣碑稱弟子
長樂公主公主爲肅宗長女始封長樂徙封宿國下
嫁豆盧湛碑寫葛覃爲葛覃陸德明釋文葛覃本亦
作覃

右僕射裴遵慶碑 大歷十一年二月

右右僕射裴遵慶碑在洛陽縣金石錄云史云遵慶
薨時年九十餘碑云年八十五今碑無年八十五字
上下亦無泐痕不知趙氏何以有此言新唐書宰相
世系表遵慶父蜷字翁喜杭州刺史河東縣男祖義
弘中書舍人碑稱大父口中書舍人義弘府君考贈

司空□□卽蜷也子會太子中舍人亦見碑中

妬神頌 大歷十一年五月

右妬神頌在平定州魏書地形志石艾縣有妬女泉
及祠卽此頌題判官游擊將軍守左清道率府率賜
紫金魚袋上柱國李譔撰新唐書宰相世系表李譔
鄆州司功叅軍

慈州刺史王履清碑 大歷十二年二月

右慈州刺史王履清碑在高陵縣碑稱汾陽王以吉
昌濁河上流邊郡善地戎州夷落易動難安新唐書
地理志吉昌縣屬慈州此卽言其爲慈州刺史事惜
下殘缺不可考

內侍監高力士碑

大歷十二年五月

右內侍監高力士碑在蒲城縣碑僅存上截稱夫人呂氏舊唐書高力士傳開元初瀛州呂玄悟作吏京師女有姿色力士娶之爲婦擢玄悟爲少卿刺史元和姓纂玄悟陳王傅光祿卿生同正鄆鄆州刺史同正生遜造崇訓女適將軍高力士則呂氏是同正之女玄悟之孫女也未知孰是

玄靖先生李含光碑

大歷十二年五月

右玄靖先生李含光碑在句容縣茅山石已碎裂此尙是舊拓本碑稱先生姓李氏本姓弘以孝敬皇帝廟諱改焉元和姓纂監察御史洪察本姓弘氏避孝

敬諱改姓洪氏當時避諱改姓亦無定字碑稱嘗以
本草之書精明藥物著音義兩卷又以老莊周易爲
索靜之書著學記義略各三篇俱見新唐書藝文志
贈楊州大都督段行琛碑 大歷十四年閏五月
右贈楊州大都督段行琛碑在汧陽縣行琛太尉段
秀實之父舊唐書段秀實傳行琛洮州司馬碑云旣
齒鄉試高標甲科簡脩獨耀於錦衣從事仍屈於黃
綬不言所授之官亦叙事之疎

華嶽趙宗儒等題名

右華嶽趙宗儒等題名在華陰縣舊唐書趙宗儒傳
宗儒舉進士初授弘文館校書郎此題弘文館校書

郎正其舉進士初也李益宰相揆族子兩唐書本傳
俱不言爲鄭縣主簿唯全唐詩小傳言大歷四年登
進士第授鄭縣尉久不調卽與李賀齊名者也又有
義陽府左果毅丁希口義陽府新唐書地理志不載

大岨山銘

建中元年四月

右大岨山銘在濬縣末題唐建中元年四月廿六日
勅魏博成德幽州等道黜陟使諫議大夫洪經綸題
舊唐書洪經綸有傳稱建中初爲黜陟使與碑合也
元和姓纂監察御史洪察常州人本姓弘氏避孝敬
諱改姓洪氏生子興起居舍人生經綸諫議大夫
贈太子少保顏惟貞廟碑并陰

建中元年七月

右贈太子少保顏惟貞廟碑在西安府學宮四面刻
字俗稱爲四面碑魯公爲惟貞第七子碑作第六或
魯公有姊男女不異長也碑勤禮贈虢州刺史生昭
甫注云本名顯甫元和姓纂作勤禮生顯甫與注同
碑述其祖父羣從甚詳關中金石記據之以作魯公
世系以元和姓纂證之尙多闕佚碑陰稱高祖妣殷
夫人居十字街西北壁第一宅祕書監君禮部侍郎
侍焉祕書監君顏師古也長安志祕書監顏師古宅
在敦化坊西門之北時人呼爲吳兒坊

景教流行中國碑

建中二年正月

右景教流行中國碑在西安府崇聖寺碑稱大秦國

有上德曰阿羅本貞觀九祀至于長安貞觀十有二
年詔曰道無常名聖無常體隨方設教密濟羣生大
秦國大德阿羅本遠將經像來獻上京詳其教旨玄
妙無爲觀其元宗生成立要詞無繁說理有忘筌濟
物利人宜行天下所司卽於京義寧坊造大秦寺一
所度僧廿一人唐會要載此詔略同唯作波斯僧阿
羅本波斯卽大秦國本號長安志作阿羅斯誤

大辨正三藏和尚不空碑

建中二年十一月

右大辨正三藏和尚不空碑在西安府學宮權文公
集有唐大興善寺大辨正三藏和尚影堂碣銘與此
碑可互證碑就臥內加開府儀同三司肅國公影堂

碣作蕭國公碑大歷口口夏六月癸未減度於京師
大興善寺影堂碣作大歷九年夏六月既望碑和尙
諱不空西域人影堂碣作師子國人碑亦見唐文粹
吳嶽祠堂記 興元元年十月

右吳嶽祠堂記在隴州西鎮吳山廟鳳翔副元師西
平郡王李晟以興元元年十月十一日有事于吳嶽
祠掌書記于公異爲撰此記將仕郎行太子正字冷
朝陽書元和姓纂貞元兼監察御史冷朝陽吳人李
嘉祐有送冷朝陽及第歸江寧詩

魏文侯師段干木廟銘

貞元元年八月

右魏文侯師段干木廟銘在芮城縣水經注河水自

河北城南東逕芮城二城之中有段干木冢後人因
建廟于其地范陽盧士牟撰此銘新唐書宰相世系
表盧士牟和州刺史碑剛作劉偃作偃避作避皆異
文

大岨山銘

貞元二年五月

右大岨山銘在濬縣貞元二年五月汴宋節度使劉
玄佐討李希烈凱還屯兵大岨判官相州司戶叅軍
李沛爲撰此銘玄佐本名洽新唐書德宗本紀興元
元年正月戊戌劉洽爲汴滑宋亳都統副使舊唐書
本紀十月甲午以李澄爲汴滑節度使十一月癸卯
宋亳節度使劉洽破李希烈之衆於陳州此碑又改

爲汴宋節度使史不載

華陽三洞景昭法師碑

貞元三年正月

右華陽三洞景昭法師碑在句容縣茅山凡釋氏題
銜稱名而不著姓道家則兼姓稱之張禪師義琬墓
誌以釋氏而稱姓此碑又單稱景昭法師皆變例也
碑爲陸長源撰寶泉書寶泉撰述書賦陸長源結銜
稱檢校國子司業吳縣開國男兩唐書本傳皆不載

姜嫄公劉廟碑

貞元九年四月

右姜嫄公劉廟碑在邠州城南碑引尙書臯陶作咎
繇毛詩于幽斯館幽作邠論語上之禱久矣無之字

鴻臚少卿張敬詵墓誌銘

貞元十年九月

右鴻臚少卿張敬誥墓誌銘在洛陽縣誌稱東都副
留守河南尹裴公謂命公爲押衙唐會要中書門下
奏准諸道節度使下都押衙都虞候約五年以上方
得改轉押衙兵馬使七年以上方得改轉新唐書百
官志節度使衙推一人其卽押衙歟碑儒作儒匡作
匡鯁作梗漚作漚兩作雨哭作哭皆異文

嵩山會善寺戒壇記

貞元十一年七月

右嵩山會善寺戒壇記在登封縣題汝州刺史兼御
史中丞陸長源撰河南陸郢書末題時貞元十一祀
龍集乙亥大火西流之月刻在大歷二年戒壇勅牒
碑陰金石錄墨池編寶刻類編俱有此碑

河東鹽池靈慶公神祠碑并陰

貞元十三年八月

右河東鹽池靈慶公神祠碑在安邑縣新唐書地理志解縣有鹽池安邑縣有鹽池與解爲兩池大歷二年生乳鹽賜名寶應慶靈池皆屬河中府此神祠碑雖在安邑其實爲兩池官吏及畦戶等所建碑陰又刻靈慶公神堂記以碑後列銜考之兩池官吏有戶部判度支專知度支河中院有專知解縣池專知安邑池河中院有巡官都巡檢官勘會官檢閱官監官場官而場名則有方集常滿鹽北青鼻分雲紫泉下封資國皆可補史之闕

濟瀆廟北海壇祭器雜物銘并陰

貞元十三年

右濟瀆廟北海壇祭器雜物銘在濟源縣碑稱有唐
六葉封茲瀆爲清源公建祠於泉之初源置瀆令一
人齋郎六人其北海封爲廣澤王立壇附於水濱唐
會要天寶六載正月十二日濟瀆封爲清源公十載
正月二十三日封北海爲廣澤王新唐書百官志五
嶽四瀆令各一人祝史三人齋郎各十三人與此碑
人數不同者當由此後改制碑陰載祭器雜物副壇
席席卽席字五幅悌悌卽悌字倚子今俗作椅疊子
今俗作磔餘如幣作幣枚作枚案作櫟帳作帳薰作
勳皆異文

監察御史王仲堪墓誌銘

貞元十三年

右監察御史王仲堪墓誌銘在京師廣渠門內碑稱仲堪授幽州大都督府戶曹叅軍以能轉兵曹叅軍新唐書百官志大都督府列曹叅軍事皆正七品下戶曹第三兵曹第五此由戶曹轉兵曹蓋事有繁簡也碑又稱奏充節度行軍叅謀百官志節度行軍叅謀關像軍中機密開元十二年罷行軍叅謀尋復置同州澄城令鄭楚相碑貞元十四年正月

右同州澄城令鄭楚相碑在澄城縣碑稱楚相宰是邑百姓孫士良等請命朝省詔俞銘紀功德于其理所之南門碑爲衛尉卿鄭雲達書兩唐書鄭雲達傳不載爲衛尉卿新唐書百官志衛尉寺卿一人從三

品金石萃編以爲唐書百官志無衛尉卿以雲達署
銜用古官名非也

彭王傳會稽郡公徐浩碑

貞元十五年十一月

右彭王傳會稽郡公徐浩碑在偃師縣學宮碑稱浩
爲銀□□祿大夫洛州刺史贈左散騎常侍嶠之之
子法書要錄載徐浩古蹟記臣先考故洛州刺史贈
左常侍嶠之舊唐書徐浩傳作洛州刺史者誤也碑
又稱洎貞元十五年嗣子□罷宰王畿之新安縣爲
□府法曹叅軍掾璫玳舉進士未第伯仲之存四人
現常以家傳遺文俛叙其志嗣子名泐者卽現也碑
爲現書結銜稱次子朝議大夫河南府新安縣令□

□縣開國□字尚可辨元和姓纂洛州刺史徐嶠之
居會稽生浩東海郡公生瑋現玫瑰沁州刺史碑不
言瑋者其時已卒也

軒轅皇帝鑄鼎原銘并陰

貞元十七年正月

右軒轅皇帝鑄鼎原銘在閔鄉縣題虢州刺史王顏
撰華州刺史袁滋籀書諦視其碑悉是小篆不知何
以謂之猶據廣川書跋此碑是韋諷所書今題識已
摩滅不可辨矣碑陰刻王顏進玉石佩表

追樹晉司空河東太守王卓碑

貞元十七年

右追樹晉司空河東太守王卓碑在臨晉縣碑爲虢
州刺史王顏撰自稱卓爲十八代祖太原王氏始自

四十一代祖周平王孫赤與新唐書宰相世系表太原王氏不合世系表亦無王卓支系當是太原別支

千福寺楚金禪師碑

貞元二十一年七月

右千福寺楚金禪師碑在西安府刻於多寶塔感應碑陰碑稱楚金以乾元二年七月七日子時卒貞元十三年四月十三日左衛功德使開國公寶文場奏乞賜謚大圓禪師新唐書百官志貞元四年崇玄館罷大學士後復置左右衛大功德使總僧尼之籍亦以內官爲之

押衙張詵夫人樊氏墓誌銘

永貞元年十月

右押衙張詵夫人樊氏墓誌銘在洛陽縣與前鴻臚

少卿張敬誥爲一人而所叙祖父名位并里貫薨日俱不同樊氏之卒在敬誥卒後十年門祚衰落沙門撰碑又未暇深考故兩誌多舛錯前誌稱窆於瀝澗之陽邨山之新塋此誌合葬於平樂鄉朱陽原蓋窆後改葬前誌三女歸王氏此誌三女適天水趙詡亦改適也

劍南西川節度使韋臯紀功碑并陰

元和三年四月

右劍南西川節度使韋臯紀功碑在簡州碑字多殘泐不能完讀寶刻類編有韋臯紀功碑德宗製皇太子誦書一在彭州貞元二十年十一月十日立一在簡州貞元二十年十二月立此卽簡州碑也碑陰結

銜上有貞元二十年十一月二十日不知寶刻類編何以云十二月立碑末有元和三年四月廿五日勒口一行寶刻類編亦不言

孟再榮造像記

元和三年七月

右孟再榮造像記在西安府結銜稱大盈庫染坊等使舊唐書食貨志王鉷每歲進錢百億寶貨稱是云非正額租庸便入百寶大盈庫以供人主宴私賞賜之用唐六典織染坊舊隸少府監後別置織染署令一人正八品上穆宗本紀有染坊使用晨

左拾遺寶叔向碑

元和三年十月

右左拾遺寶叔向碑在偃師縣碑稱高祖善衡新唐

書宰相世系表作曾祖善衡碑稱考胤同昌郡司馬
舊唐書竇羣傳祖亶同昌郡司馬皆與史不合世系
表叔向子常牟羣庠輩皆見于碑常牟夫人袁氏生
羣庠輩繼室臨汝太君生碑題第十一姪朝議郎尚
書口口員外郎易直書元和姓纂叔向從父弟彧生
易直兵部郎中御史中丞

龍泉記

元和三年

右龍泉記在芮城縣鄉貢進士張鑄述河東裴少微
書末題順宗傳位之明年涼風至旬有五日記河東
裴勣書額下又題元和戊子歲月在高藂十八日書
則張鑄撰此記在元和元年裴少微書此記又在元

和三年

蜀丞相諸葛武侯祠堂碑

元和四年二月

右蜀丞相諸葛武侯祠堂碑在城都府碑爲裴度撰
柳公綽書是時同在武元衡幕僚裴結銜稱掌書記
侍御史柳結銜稱成都少尹侍御史此侍御史皆兼
銜唐會要謂之憲官故本傳皆刪而不書

保唐寺毘沙門天王燈幢贊

元和七年五月

右保唐寺毘沙門天王燈幢贊在咸寧縣長安志菩提寺在平康坊南門之東大中六年改爲保唐寺大
慈恩寺注又云會昌六年菩提寺改爲保唐寺據此
幢元和七年已有保唐寺之名矣

內侍李輔光墓誌銘

元和九年四月

右內侍李輔光墓誌銘在咸陽縣誌稱元和初皇帝踐祚遷內常侍明年銀夏裨將楊惠琳西蜀副帥劉闢或以長帥薨歿皆恃塞怙險初有邀君之心終成悖亂之跡舊唐書本紀楊惠琳劉闢之誅皆在元和元年志所云明年謂憲宗踐祚之明年也誌又稱輔光爲印納使其太僕寺之官歟

心經幢

元和十二年二月

右心經幢在長安縣前列心經後有僧惟深等題名又有覺悟寺講四分舊疏教授律大德常政一切經音義有四分律六十卷

平陽府志卷七
龍城石刻

元和十二年

右龍城石刻在馬平縣柳侯祠文云口城柳神口守
驅厲鬼出匕首福四民制九醜醜上九字諦視甚明
金石萃編釋作元醜誤

佛本行集經幢

元和十四年四月

右佛本行集經幢在直隸某縣僅存三殘石上題佛
本行集經卷三十一幽州盧龍兩節度使劉相公敬
造劉相公者劉總也舊唐書本紀元和十一年十月
丙寅幽州節度使劉總加平章事故稱相公新唐書
方鎮表寶應元年范陽節度使復爲幽州節度使及
平盧陷又兼盧龍節度使

寶華題名殘碑

右寶華題名殘碑在青州府城碑字八行唯寶華韋
會齊孝弘薛華士源方回姓名可辨其結銜已殘缺
碑字左行其第一行有州觀察處置押新羅渤海兩
蕃等使山左金石志據憲宗紀元和十四年三月己
丑以義成軍節度使薛平爲青州刺史充平盧軍節
度淄青齊登萊等州觀察等使卽其人舊唐書薛平
傳及平李師道朝廷以東平十二州析爲三道以淄
青齊登萊五州爲平盧軍以平爲節度觀察等使乃
押新羅渤海兩蕃使與此碑結銜正同新唐書宰相
世系表平韓國公此碑第二行有青州刺史御史大

夫上柱國韓國亦平結銜第三行無字土當有薛平
姓名

南海神廣利王廟碑

元和十五年十月

右南海神廣利王廟碑在南海縣碑題使持節袁州
諸軍事守袁州刺史韓愈撰碑建于元和十五年十
月一日舊唐書本紀元和十四年十月丙寅以韓愈
爲袁州刺史十五年九月辛酉以袁州刺史韓愈爲
朝散大夫守國子祭酒是年九月庚子朔辛酉爲二
十二日此碑十月一日尙題守袁州刺史其時祭酒
之命尙未到袁也

平津讀碑記卷八

臨海洪頤煊

唐

忠武軍監軍使朱孝誠碑

長慶元年二月

右忠武軍監軍使朱孝誠碑在三原縣碑稱先皇深憂漠北慮啓邊患公密陳嘉謨請城天德許詔旣下仰辦於公量財揆日功先板築元和郡縣志天德軍本大安軍在大同川西乾元後改爲天德軍權居永清柵又移在西受降城自後頻爲河水所侵元和八年防禦使周懷義表請修築李吉甫以西城費用至廣功難施行請修天德舊城以安軍鎮孝誠陳請又

在元和修築之前

吐蕃會盟碑

長慶元年

右吐蕃會盟碑在喇薩刻于石柱上舊唐書吐蕃傳
長慶元年九月吐蕃遣使請盟乃命大理卿兼御史
大夫劉元鼎充西蕃盟會使十月十日與吐蕃使盟
宰臣及右僕射六曹尚書中執法太常卿司農卿京
兆尹金吾大將軍皆預焉仍勅元鼎到彼令宰相已
下各於盟文後自書名二年二月遣使來請定界六
月劉元鼎自吐蕃使迴奏云去四月二十四日到吐
蕃牙帳以五月六日會盟訖此卽五月六日所盟文
也文後本有諸臣題名此拓本失之 大清一統志

載有此碑釋文與此多不同

邠國公梁守謙功德銘

長慶二年十二月

右邠國公梁守謙功德銘在西安府學宮碑爲翰林待詔楊承和撰書陸邳題額時守謙爲右街功德使承和爲右街功德副使皆以內侍充此官副使之名不見于新唐書百官志元和姓纂邳陸綜子

修浯溪記

寶歷元年五月

右修浯溪記在邠陽縣元結集有浯溪銘序云浯溪在湘水之南北漚于湘愛其勝異遂家溪畔結卒後五十年季子友讓以元和十三年春爲道州長史復修浯溪江州司馬韋詞爲撰此記後有寶歷元年五

月廿三日元友讓題距韋詞作記時又八年矣韋詞
字踐之官至湖南觀察使見新唐書宰相世系表

佛頂尊勝陀羅尼經幢

寶歷二年三月

右佛頂尊勝陀羅尼經幢在濟寧州城內普照寺幢
六面刻字第一面有大唐寶歷二年歲在丙午三月
戊辰十五日壬午發心主□□□公孫超弟寬□於
幢上鐫佛頂尊勝陀□□□字餘俱磨泐不可辨

太尉西平郡王李晟碑

大和三年二月

右太尉西平郡王李晟碑在高陵縣祠中晟以貞元
九年八月四日薨至大和元年秋七月其子聽上言
文宗特令裴度撰此碑柳公權書近爲庸妄人補刻

以金薤琳琅所釋證之曾祖嵩贈澤州刺史今碑澤作洸具以狀聞碑狀下有以字立成師法碑師下有之字法下有致字故迤延于後碑延作凝裴度結銜守司空碑守作爵此皆補刻之譌唐文粹載此碑曾祖嵩無贈洸州刺史五字學不爲人人作已與所從十數數下有騎字都知兵馬使下無四面都遊奕使六字乘墉壑如通道哲梟獍以清宮如作而道上有軌字哲作磔宮下有禁字異同甚多此又刊本妄改其譌舛更不足言矣

嵩高靈勝寄王侍郎詩

大和三年六月

右嵩高靈勝寄王侍郎詩在登封縣中嶽廟河南尹

王侍郎准制守衛尉少卿尉遲汾狀嵩高靈勝三十
韻寄之詩有細注此體仿于謝靈運山居賦張淵天
象賦汾復踵爲之

東郡懷古詩

大和四年六月

右東郡懷古詩在滑縣李德裕爲義成軍節度使懷
王京兆陽給事而作也王京兆爲漢東郡太守王尊
陽給事爲宋濮陽太守陽瓚兩唐書本傳德裕以大
和三年九月出爲鄭滑節度使此詩作于大和四年
六月一日在到任後一年

右內率府兵曹鄭準墓誌銘

大和四年八月

右右內率府兵曹鄭準墓誌銘在宜興縣曾祖璿祖

溥父華俱見新唐書宰相世系表唯不及準世系表
華太常博士誌作駕部郎中吉州刺史準卽吉州之
少子有子曰宗儒宗韞宗慶宗遜皆可補表之闕

洋王府長史吳達墓誌銘

大和四年十月

右洋王府長史吳達墓誌銘在長安縣誌云歷階奉
義郎累試洋王府長史舊唐書憲宗第五子忻貞元
二十一年封爲高密郡王元和元年進封洋王達之
累試長史當在元和元年以後

佛頂尊勝陀羅尼經幢

大和六年四月

右佛頂尊勝陀羅尼經幢在長安縣百塔寺經後有
銘題內供奉僧廬川文白閣無可書無可賈島弟寂

照和上碑題少華山樹谷無可杜詩顛倒白閣影白
閣峯名與終南山近皆其所居地名

甄叔大師塔銘

大和六年四月

右甄叔大師塔銘在萍鄉縣甄叔住楊岐山卒于元
和庚子正月十三日錢辛楣少詹作元和庚寅金石
萃編作元和庚午皆誤輿地紀勝楊岐山在萍鄉縣
北七十里

龍泉記

大和六年七月

右龍泉記在芮城縣大和六年夏陝虢羣牧使袁孝
和禱雨龍泉有應芮城縣令鄭澤爲撰此記文云大
和五年秋六年春歷四甲子無雨雖有風雪亦不及

農用舊唐書本紀大和五年是冬京師大雨雪六年春正月乙未朔以久雪廢元會壬子詔自去冬已來踰月雨雪寒風尤甚陝虢去京非遠其雨澤不同如此

硤石寺造上方閣記

大和七年六月

右硤石寺造上方閣記在鳳臺縣訪碑錄作青蓮寺碑太平寰宇記硤石山在晉城縣東南三十里上有青蓮寺西有擲筆臺卽遠大師置涅槃疏藏之所與記所言合

寂照和上碑

大和七年十二月

右寂照和上碑在咸陽縣碑稱寂照族龐氏京兆興

平人父詮灌鍾府折衝鎮于咸陽馬跑泉新唐書地理志無灌鍾府之名碑又稱貞元十年春將口于清涼山清涼山另殊大士是司鱗長遊之不誠必有疾雷烈風後之修五臺山志者未之及

劉夫人辛氏墓誌銘

大和九年十月

右劉夫人辛氏墓誌銘在益都縣誌稱夫人辛氏隴西郡人娉于彭城劉公公不幸早薨而不著其名碑前題唐故平盧軍節度押衙兼左廂兵馬使其長子亦稱平盧節度衙前虞候新唐書方鎮表大和二年淄青平盧節度增領棣州舊唐書本紀大和五年十一月己未以王承元檢校司空青州刺史充平盧軍

節度使此時平盧已不兼淄青誌立于大和九年又在其後

劍南東川節度使馮宿碑

開成二年五月

右劍南東川節度使馮宿碑在長安縣新唐書馮宿傳婺州東陽人碑云冀州長樂人而下文又云乞歸江左以奉色養元和姓纂馮宿長樂人後徙東陽碑所著特其舊望爾碑稱宿父諱子華宿遷華州刺史以州名犯先公諱固讓不拜子華之華讀平聲華州之華讀去聲字同音異晉書王舒傳舒父會王導欲出舒爲會稽內史舒辭以父名朝議以字同音異於禮無嫌故宿亦固讓而後不拜也

國子學石經

開成二年

右國子學石經在西安府學宮周易九卷尚書十三卷毛詩廿卷周禮十一卷儀禮十七卷禮記廿卷春秋左氏傳卅卷春秋公羊傳十二卷春秋穀梁傳十二卷孝經一卷論語十卷爾雅三卷凡十二經每經刻經文而不及注每經下必題某注兼及序文者以證如易是王弼本書是孔安國本也封氏聞見記天寶中予在太學與博士諸生共論經籍失正爲欲建議請立大唐石經遷延未發而蕃寇海內文儒道消至今四十六年兵革未息嗚呼石經之事亦俟河之清也又李陽冰上李大夫書願刻石作篆備書六經

於明堂爲不刊之典號曰大唐石經使百代之後無所損益此經刻成二君已不及見矣

五經文字

右五經文字三卷國子司業張參撰參成書在大歷十一年開成二年與九經字樣附刻在國子學石經之後未有乾符三年孫毛詩博士自牧以家本重校勘定題字五經文字本先書於壁自牧得其舊本校勘石本之謬故記于後非至乾符中始刻於石也參序例云蔡伯喈以滅學之後經義分散乃請刊定五經備體刻石立於大學之門外是以三字石經爲邕所書

九經字樣

右九經字樣一卷題覆定石經字體官朝議郎權知
沔王友翰林待詔上柱國賜緋魚袋臣唐玄度撰前
有開成二年八月十二日中書門下牒國子監奏玄
度狀准大和漆年拾貳月伍日勅覆定九經字體者
今所詳覆多依司業張參五經文字爲准今與校勘
官同商較是非取其適中纂錄爲新加九經字樣壹
卷據舊唐書鄭覃傳文宗本紀石刻九經創始于大
和四年至開成二年冬刊成玄度以大和七年卽奉
詔覆定九經字體開成二年八月奏上之故石經後
題銜卽稱覆定字體官

樊忠義功德碑

開成三年三月

右樊忠義功德碑在魚臺縣池頭集碑稱考諱元信
曾任武寧軍討擊副使唐會夢徐州節度使貞元二
十一年三月名其軍曰武寧至咸通四年四月降爲
支郡隸兗州

大泉寺新三門記

開成三年十一月

右大泉寺新三門記在句容縣城內記稱初寺每有
僧俗大會五千餘衆號曰龍華荆楚歲時記四月八
日諸寺各設齋以五香水浴佛作龍華會以爲彌勒
下生之徵唐人重此會故題詠中屢及之

義陽郡王苻璘碑

金石萃編附在開成三年

右義陽郡王苻璘碑在富平縣學宮新唐書苻璘附見其父合奇傳卽據此碑爲文碑之泐字尙可據傳補之新唐書田悅傳悅以苻璘康情爲爪牙璘之降也未必出于本心而新唐書列于忠義傳亦幸矣哉璘入覲賜靖恭里第一所長安志輔國大將軍苻璘宅在靖恭坊街南之西北隅

鄭弘禮妻李氏夫人墓誌

開成四年四月

右鄭弘禮妻李氏夫人墓誌在孟縣誌鄭弘禮河南府河陽縣太平鄉臨泉村人又云殯于河南府河陽縣太平鄉西沼村李元淳墓誌云塋河陽太平鄉高端岡張建封墓誌云塋河陽太平鄉號村此鄉名之

可考證者

大遍覺法師立焚塔銘

開成四年五月

右大遍覺法師立焚塔銘在西安府碑爲劉軻撰撫
言稱劉軻少爲僧止于豫章高安縣南果園復求黃
老之術隱於廬山旣而進士登第與韓柳齊名兩唐
書不爲軻立傳據此碑結銜稱檢校尙書屯田郎中
使持節洺州諸軍事守洺州刺史新唐書藝文志劉
軻春秋三傳指要十五卷

慈恩寺基公塔銘

開成四年五月

右慈恩寺基公塔銘在咸寧縣碑爲李弘慶撰新唐
書宰相世系表李弘慶金州刺史與碑結銜同碑引

吏部李侍郎父兩唐書李父傳稱父以文章自名弟兄同爲一集號李氏花萼集

馬恒郝氏二夫人墓誌銘

開成六年九月

右馬恒郝氏二夫人墓誌銘在館陶縣館陶本唐永濟縣訪碑錄以爲山西永濟非也碑前題唐貝州永濟縣故馬公郝氏二夫人墓誌銘碑額單題墓誌二字又享年卅下有十字皆庸俗人所書

重修大像寺記

會昌元年五月

右重修大像寺記在隴州碑稱大和乙卯歲潁川郡陳公爲左神策將軍擁二州之地乙卯爲大和九年舊唐書本紀是年九月丁卯以工部尙書鄭注檢校

右僕射充鳳翔隴右節度使十一月壬戌中尉仇士良誅鄭注丁卯以左神策大將軍陳君弈爲鳳翔節度使碑云以其誅暴息亂宸衷親付之右地是甘露之禍君弈與謀亦士良之黨也

佛頂尊勝陀羅尼經幢

會昌元年六月

右佛頂尊勝陀羅尼經幢在紹興府蔽山書院嘉泰會稽志以爲奚獎書今名已殘泐有前昭義軍節度要藉字可辨新唐書方鎮表大歷元年相衛六州節度賜號昭義軍節度使中和二年節度使孟方立徙昭義軍於邢州而兼領潞州自是五州有二昭義節度此幢立于會昌元年尙在未徙之前新唐書百官

志節度府院法直官要藉逐要親事各一人朱滔傳
改驅使要藉曰承令此要藉亦官名

大達法師玄秘塔碑 會昌元年十二月

右大達法師玄秘塔碑在西安府學宮裴休撰柳公
權書休結銜錢辛楣少詹以爲山南西道都團練觀
察處置等使唐書方鎮表建中元年升山南西道觀
察使爲節度使嗣後無降爲團練使事疑史有脫誤
金石萃編以爲南上字已泐是江字下半非山字諦
視之良然方鎮表貞元元年廢江南西道節度使復
置都團練觀察使至咸通六年升江南西道團練觀
察使爲鎮南軍節度使此碑立于會昌元年其結銜

題江南西道都團練觀察處置等使正與史合

佛頂尊勝陀羅尼經幢

會昌三年十月

右佛頂尊勝陀羅尼經幢在湖州府天寧寺幢本會
昌三年十月九日潁川陳榮建僧令洪書末又有小
字題云會昌三年九月十日樹至會昌五年六月十
七日准勅廢至大中元年十一月廿八日重建又有
湖州刺史令狐綯押衙陳敷衙前虞候吳允中等題
名舊唐書令狐綯傳會昌五年出爲湖州刺史大中
二年召拜考功郎中是時綯尙爲湖州刺史新唐書
百官志刺史領使則置副使推官衙官州衙推軍衙
推綯爲湖州刺史未領節度亦有押衙衙前虞候史

未詳也

疊綵山記

會昌四年七月

右疊綵山記在臨桂縣又有四望山記卽疊綵山之支峰粵西金石略以爲俱元晦撰未知何據碑藏作藏亦異文

尹府君朱氏夫人墓誌銘

會昌四年十一月

右尹府君朱氏夫人墓誌銘在孟縣誌以子婦爲新婦又稱長女十四娘夫張氏十五娘歸闕氏吳自牧夢梁錄議親第幾位娘子黃魯直求親啓賢第幾小娘賢第十九娘子唐宋俗稱皆如此碑駟作嚙終作終匹作正皆俗字

七種經咒真言幢 大中二年八月

右七種經咒真言幢在湖州府天寧寺末題太中大
夫使持節湖州諸軍事守湖州刺史上柱國蘇特特
蘇冕之子蘇滌之兄元和姓纂作持又不載其歷官
皆闕佚

周公祠潤德泉記 大中二年十月

右周公祠潤德泉記在岐山縣前列鳳翔府岐山縣
鎮檢驗得泉狀次鳳翔觀察使崔珙奏次中書門下
并賜名勅次批答崔珙手詔次崔珙謝表可見唐時
奏牘之式崔珙前奏以大中二年十一月廿日上十
二月八日勅賜名潤德泉末行年月銜名是前奏所

具刻石時移列于後

贈工部尚書張仁憲碑

大中二年

右贈工部尚書張仁憲碑在文安縣集古錄目有此碑幽州節度使掌書記李儉撰幽州節度叅軍蔡陵八分書今名尚可辨仁憲貞元初授太子中允以孫仲武爲盧龍節度使贈工部尚書祖佐明幽州游徼府右果毅都尉新唐書地理志幽州下不載游徼府之名仲武子直方爲國子祭酒兼御史中丞兩唐書本傳亦不載

華嶽李貽孫題名

大中三年十二月

右華嶽李貽孫題名在華陰縣貽孫以大中三年十

二月八日奉制祈雪結銜稱左諫議大夫充弘文館學士判館事實刻類編有大中四年秘書監陳商誌李貽孫撰結銜與此正同其時尚未遷官華嶽又有大中五年七月廿七日李貽孫題名結銜稱福建都團練觀察處置等使疑貽孫之改官赴任卽在此時

華嶽于德晦等題名

大中六年三月

右華嶽于德晦等題名在華陰縣德晦爲同州刺史見新唐書宰相世系表又有口州鎮國軍判官題名地理志華州有鎮國軍州上泐者當是華字

吏部尙書高元裕碑

大中六年十一月

右吏部尙書高元裕碑在洛陽縣寶刻類編有此碑

稱蕭鄴撰柳公權書今蕭下鄴字已泐柳公權字尙可辨碑述曾祖迴上有皇朝蒲州長史撰小史行於代新店書藝文志高氏小史一百二十卷高峻初六十卷其子迴復釐益之是峻爲元裕之高祖也蕭鄴結銜稱彭城縣開國男食邑三百戶新唐書本傳不載

相國魏謩先廟碑

大中六年十一月

右相國魏謩先廟碑在長安縣碑斷裂僅存五石寶刻類編有此碑碑前題銜上半已泐下半有判戶部事上柱國賜紫金魚袋魏公先廟銘字可辨舊唐書魏謩傳大中二年遷御史中丞謝日面賜金紫之服

兼戶部侍郎判本司事等以本官同平章事判使如
故與碑題銜正合碑云鄭國文貞公魏氏在貞觀立
家廟于長安昌樂里長安志昌樂坊有太子太師鄭
國公魏徵家廟大中中來孫蕃爲相再新舊廟以元
成爲封祖卽此

盧鄩幼女姚婆墓誌

大中七年七月

右盧鄩幼女姚婆墓誌在榮澤縣玉篇婆母也女而
曰婆亦猶稱女爲娘皆頌禱之詞

圭峯定慧禪師碑

大中九年十月

右圭峯定慧禪師碑在鄆縣碑云大和二年慶成節
徵入內殿問法要賜紫方袍玉海引實錄文宗大和

七年八月中書門下奏請以十月十日爲慶成節羣臣詣延英門奉觴上壽此碑大和二年己稱慶成節是從後追書之

襄州別駕韓昶自爲墓誌銘

大中九年十一月

右襄州別駕韓昶自爲墓誌銘在孟縣昶爲韓文公愈子小名曰符誌稱大中九年六月八日終年五十七又云年至二十五及第釋褐則當長慶三年韓文考異樊注引愈墓誌及登科記公子曰昶登進士第在長慶四年與此誌差一年昶有男五人曰緯曰綰曰緄曰緄曰綺曰統新唐書宰相世系表止載其二曰緄曰袞緄卽袞字

劉公夫人霍氏墓誌銘

大中十年正月

右劉公夫人霍氏墓誌銘在孟縣誌稱行內侍省內侍伯致仕彭城郡開國公劉夫人霍氏而不著劉公之名子三人曰復禮威遠軍監軍使威遠軍在劔南道榮州見新唐書地理志

鄭遇夫人崔氏墓誌銘

大中十二年二月

右鄭遇夫人崔氏墓誌銘在濬縣又有一碑文字悉同惟改鄭遇作鄭恒亦在濬縣夫人崔氏顧亭林謂卽今世所傳崔鶯鶯者也今以兩碑相校長膺瓌奇之名鄭恒本瓌作環爲友朋宗鄭恒本爲作成雖上士神不優德鄭恒本土作出其歸一也鄭恒本也作

旨終於淇隩之私第鄭恒本隩作澳次曰璿鄭恒本作璩中州金石記謂恐後人得鄭遇碑改爲鄭恒以銜世然唐人書碑世字皆闕筆碑稱高祖世斌又蓋世一霜兩本皆不闕筆又子長曰瑱攝汲縣丞知縣事唐時縣令無此結銜鄭恒本固謬鄭遇本亦未可信

郎官石柱題名

大中十二年十一月

右郎官石柱題名在西安府學宮有兩唐書無傳其人尙可考者吏部郎中韋憬金部郎中牛方裕員外郎趙金穀司封員外郎封亮見元和姓纂吏部員外郎王定倉部員外郎權白迥見權文公集其題銜皆

同

佛頂尊勝陀羅尼經幢

咸通四年八月

右佛頂尊勝陀羅尼經幢在龍溪縣碑首題漳州稗
口魚南界遊奕將王嗣西平郡王李晟碑有四面都
遊奕使

佛頂尊勝陀羅尼經幢

咸通六年八月

右佛頂尊勝陀羅尼經幢在許州碑云塑和尚真身
儀一軀古塑像之塑魏李仲璇修孔子廟碑唐青蓮
寺碑皆作素又或作塼以素作塑始見于此幢

太原處士王仲建墓誌銘

咸通六年十月

右太原處士王仲建墓誌銘在孟縣誌以王氏始于

太子晉晉生龜襲封于太原廿四代祖褒仕晉爲大將軍銘云元偉孝悌仕晉文帝晉書孝友傳王哀字偉元以哀作褒偉元作元偉當由撰碑人誤記碑姬作姬洽作洽稟作稟隱作隱饋作饋哭作哭皆異文

蒲臺尉過訥墓誌銘

咸通六年十一月

右蒲臺尉過訥墓誌銘在益都縣碑石甚小今僅存下截題鄉貢五經京兆杜去疾述新唐書選舉志由學徒者曰生徒由州縣者曰鄉貢鄉貢有明經進士而明經又有五經三經二經之別誌稱訥以大中十二年明經擢第當守選時潛修拔萃拔萃當時以爲制科人以爲榮故訥由明經重試此科也

佛頂尊勝陀羅尼經幢 咸通七年四月

右佛頂尊勝陀羅尼經幢在青州府司獄署外幢上截已斷以別幢證之每行約缺十五六字經後有造幢功德主張珂等題名其稱外姑蘇氏者當卽其妻母也

徐州功曹叅軍劉仕備墓誌銘 咸通八年正月

右徐州功曹叅軍劉仕備墓誌銘在長安縣誌稱父皇諱英閏特進當作父諱英閏皇特進書碑者誤乙公終於輔興里長安志輔興坊在朱雀街第三街西修德坊之南

尊勝陀羅尼經幢

右尊勝陀羅尼經幢在西安府幢上下俱殘缺後有
歲次丁亥十二月己巳朔廿八日建吏部常選司馬
霜簋文字金石萃編以丁亥爲天寶六載攷舊唐書
玄宗本紀是載十二月有丙辰壬戌不得有己巳朔
元和三年丁亥正月癸未朔二年十二月亦不得爲
己巳朔唯咸通八年丁亥正月壬寅朔則十二月己
巳朔庶或近之

新脩文宣王廟記

咸通十一年九月

右新脩文宣王廟記在曲阜縣孔子廟咸通十一年
孔子三十九代孫孔溫裕爲鄆曹濮等州觀察使奏
脩文宣王廟賈防爲撰此記後列溫裕奏并中書四

下牒新唐書方鎮表元和十四年置鄆曹濮節度使
治鄆州十五年賜鄆曹濮節度使號天平軍唐制章
奏非軍旅之事不稱節度故此碑結銜止稱鄆曹濮
等州觀察使不稱天平節度唐碑如此類甚多賈防
結銜稱攝鄆曹濮等州管驛巡官百官志節度使管
驛巡官四人

隋羅尼真言幢

咸通十二年正月

右隋羅尼真言幢在咸寧縣卧龍寺前刻千手千眼
觀世音大悲心隋羅尼次無量壽根本如來隋羅尼
次阿彌陀心真言其曰隋羅尼曰真言皆呪語也未
有王元詒等題名

贈兵部尙書韓國昌碑 咸通十三年三月

右贈兵部尙書韓國昌碑在莘縣碑殘泐不甚可辨
舊唐書國昌附在其子韓允忠傳稱國昌歷本州右
職會昌中從何弘敬破劉稹以功爲貝州刺史兼御
史中丞碑大畧如史所言國昌有子三人長曰君雄
卽允忠仲曰靖季曰楚史皆不載碑立于咸通十三
年三月廿八日至咸通十五年七月十五日恩制考
改贈兵部尙書妣改贈涼國太夫人并其祖祖妣贈
銜卽附刊于碑末亦一例也

左拾遺孔紓墓誌銘 咸通十五年三月

右左拾遺孔紓墓誌銘在滎澤縣誌稱拾遺始及第

多不伏拘束往往關試不悉集貢曹關試見唐撫言
武虛谷大令釋闕作闕誤也誌又稱今許昌太傅相
國襄陽公爲河中尹奏署觀察判官襄陽公者杜審
權也以咸通十一年爲河中尹

贈太尉魏博節度使韓允忠碑

乾符二年二月

右贈太尉魏博節度使韓允忠碑在莘縣允忠爲國
昌子前碑稱公諱國昌此碑稱考昌所未詳也碑云
遂命門吏紇干濬列石爲碑以示來裔則此碑爲濬
所撰濬爲節度判官碑前結銜猶可辨

佛頂尊勝陀羅尼經幢

乾符二年十月

右佛頂尊勝陀羅尼經幢在滎陽縣碑爲劉幼昇等

建經後有記并贊題鄉貢進士鄭昌嗣撰經幢并座
高叁拾尺用功價見錢捌拾貫文米麵共伍拾碩茶
貳拾斤鹽貳拾斤亦可見唐時工價如此

瑯琊王夫人墓幢

乾符三年二月

右瑯琊王夫人墓幢在西安府金聖寺夫人爲玉冊
官內供奉強瓊之妻錢辛楣少詹謂強氏見于史者
唯宋強至及其子淵明攷新唐書有強循附在姜師
度傳強蒙附在啖助傳蓋不始于至矣墓銘刻在石
幢後刻佛頂尊勝陀羅尼呪亦例之創者

趙琮墓誌銘

右趙琮墓誌銘在益都縣李氏誌稱別業易州來水

縣兩唐書地理元和郡縣志皆作涑水此作來字是從俗省非縣改名

謁昇仙太子廟詩

乾符四年閏二月

右謁昇仙太子廟詩在偃師縣仙君觀詩爲鄭畋作詩後有記云余大中八年爲前渭南縣尉閒居伊洛常好娛遊春夏之交獨登嵩少路由緱嶺謁昇仙太子廟畋爲渭南尉時而云閒居伊洛或有勾當公事在東都也新唐書鄭畋傳畋以書判拔萃擢渭南尉宣宗時白敏中令狐綯相繼當國皆怨李德裕其賓客皆廢斥故畋不調幾十年

佛頂尊勝陀羅尼經幢

乾符五年八月

右佛頂尊勝陀羅尼經幢在許州經後有序讚進士
邢筠撰序云在軍者爵祿咸臻新唐書地理志陳州
有忠武軍貞元元年置于許州

上谷成君信墓誌銘

乾符五年十一月

右上谷成君信墓誌銘在益都縣誌稱公諱君信字
匡時其先本周成伯之後不言某縣人碑前題上谷
成公或君信本上谷郡人而從軍于青州歟一女適
隴西牛從寔寔爲節度要籍支計斛斗司史不書
奚獎所書陀羅尼幢支計斛斗司史不書

佛頂尊勝陀羅尼及諸真言幢

乾符六年二月

右佛頂尊勝陀羅尼及諸真言幢在咸寧縣牛頭寺

幢末有中書省鐫玉冊一行當是刻字人題銜瑯琊王夫人墓銘有玉冊官內供奉重脩法門寺塔廟記有玉冊官孫福鐫字得此可互證

河東節度使李克用題名

中和五年二月

右河東節度使李克用題名在曲陽縣北嶽廟文畧云李克用以幽鎮侵擾中山領蕃漢步騎五十萬衆親來救援至三月十七日以幽州請就和斷遂却班師新唐書沙陀傳光啓元年卽中和五年幽州李可舉鎮州王景崇言易定故燕趙境請分取之於是可舉攻易州下之景崇攻無極易定節度使王處存請救于克用克用自將救無極敗鎮人攻馬頭固新城鎮兵

走處存復處易州克用之救援中山卽此史不言幽州請就和斷者畧也當以此題名爲正

佛頂尊勝陀羅尼幢

光啓四年四月

右佛頂尊勝陀羅尼幢在益都縣舊城隍廟幢止存上截每行約八九字有文耆建幢於龍興寺字可辨

萬壽寺記

景福元年八月

右萬壽寺記在岐州寺本梁太尉吳王蕭岑宅隋開皇四年立爲延興寺神龍中中宗爲永泰公主追福改爲永泰寺大中六年又改爲萬壽寺漢舊儀長安城中經緯各長三十二里十八步此作長安城方三十里亦少異

憫忠寺重修舍利塔記

景福元年十一月

右憫忠寺重修舍利塔記在京師憫忠寺記云隴西令公大王朱竹垞以爲李匡威錢辛楣少詹以爲李可舉然記於中和二年不朞年稱隴西令公大王固是李可舉其於景福壬子年請發封壤上許之者則李匡威也記時未明析言之爾

清河郡張夫人墓誌銘

景福元年十二月

右清河郡張夫人墓誌銘在益都縣題夫樂安郡孫珣撰夫爲妻誌墓又各舉其郡望爲他碑所未見銘云澠水爲鄰今雲門是鄉左氏昭十二年傳有酒如澠杜預注澠水出齊國臨淄縣北八時水水經注作

繩水古字通用

佛頂尊勝陀羅尼經幢

景福二年八月

右佛頂尊勝陀羅尼經幢在文登縣經後有記述其師皈依已歸大寂門人全意等爲建此幢末有守登州文登縣令徐肇登州軍事押衙宋裕等題名其稱勾司衙司差科司司功司司士司司戶司司法司諸名多不見于史

威武軍節度使王審知德政碑

天祐三年閏十月

右威武軍節度使王審知德政碑在閩縣審知唐以前事新唐書附見其兄王潮傳載審知歷官與碑畧同唯不言檢校司空司徒太保等碑皆稱檢校等前

題又作棟校未詳其義

重修法門寺塔廟記

天祐十九年二月

右重修法門寺塔廟記在扶風縣記稱秦王者李茂貞也未題天祐十九年歲次壬午而記中自庚辰以前俱稱天復何以又改稱天祐歐薛兩史無明文可證錢辛楣少詹之論庶爲近之此歲距唐亡已十六年矣

朱達墓碣

右朱達墓碣在郃陽縣廣平程彥矩撰稱其父弁歷金吾引駕仗押衙銀青光祿大夫檢校太子賓客達亦以懷州軍事押衙後改授山南東道節度散兵

馬使銀青光祿大夫檢校太子賓客兼監察御史碑
年月已泐以官銜證之達當爲唐末人

後梁

匡國軍節度使馮行襲碑

右匡國軍節度使馮行襲碑在許州碑殘泐所存無
幾中州金石記攷爲匡國軍節度使馮行襲德政碑
梁太祖詔翰林學士杜曉撰者卽此碑今諦視碑首
有匡國軍口度陳許汝口口州又稱命氏雖系出長
樂口家遷武當與舊五代史稱行襲爲武當人合

崇福侯廟記

開平二年

右崇福侯廟記在紹興府卧龍山記爲吳越王錢鏐

撰新五代史稱梁太祖卽位封鏐吳越王兼淮南節度使舊五代史止言乾寧四年鏐乃兼鎮海鎮東兩藩節制梁祖革命以鏐爲尙父吳越國王此記作于開平二年結銜稱淮南鎮海鎮東等軍節度使梁祖勅亦云况錢鏐任隆三鎮功顯十臣與新史同而舊史不書兼淮南節度者闕文也

昭義軍節度使葛從周碑

貞明二年十一月

右昭義軍節度使葛從周碑在偃師縣碑叙從周戰功歷官不及舊五代史之詳舊史或采自家傳碑則薛廷珪奉勅撰削煩就簡其體例宜然也碑稱時溥統全師碭山下寨康村接戰全軍□□舊史作敗時

溥于吳康吳康其卽康村歟

後唐

振武節度使李存進碑

同光二年十一月

右振武節度使李存進碑在太原府新五代史李存進傳載其歷官本末甚畧舊五代史傳稍詳亦有與碑異者傳稱天復三年授石州刺史碑作天祐三年權知石州軍州至莊宗嗣位始檢校司空使持節石州諸軍州守石州刺史傳稱破汴軍于栢鄉論功授邠州刺史轉檢校司徒碑作九年正月奉命再知汾州軍州事四月制加光祿大夫檢校司徒則舊史作邠州者誤也碑云存進字光嗣兩史俱不載

重修定晉禪院千佛邑碑

天成四年九月

右重修定晉禪院千佛邑碑在武安縣碑後列銜有
竭忠建策興復功臣安國軍節度使邢洺磁等州觀
察處置使金紫光祿大夫檢校司徒使持節邢州諸
軍事守邢州刺史兼御史大夫上柱國題銜以下闕
不可考舊五代史明宗紀天成三年三月丁巳以前
北京副畱守李從溫爲邢州節度使長興元年四月
癸丑以前邢州節度使檢校司徒李從溫爲左武衛
上將軍此碑立于天成四年則所謂邢州刺史卽李
從溫本傳云李從溫字德基代州崞縣人後唐明宗
之猶子也明宗卽位授安國軍節度使檢校司徒故

碑云金枝黃鉞掌鉅鑣之山河帝子親王秉邢臺之旌節金石萃編以邢州刺史爲符存審非是

佛頂尊勝陀羅尼經幢

長興三年八月

右佛頂尊勝陀羅尼經幢在鞏縣石窟寺舊五代史莊宗本紀同光元年十一月甲子車駕發汴州十二月庚午朔車駕至西京新五代史作甲子如洛京通鑑考異云諸書但謂之洛京未嘗詔改西京爲洛京至同光三年始詔依舊以洛京爲東都此幢立于長興三年稱洛京河南府在同光詔改之後

佛頂尊勝陀羅尼經幢

應順元年正月

右佛頂尊勝陀羅尼經幢在濟源縣龍潭寺凡二幢

前幢後有御史臺表奏官新授將仕郎守普州安居
縣主簿題名舊五代史地理志新五代史職方考俱
無普州安居縣前幢題正月壬申朔廿一日壬辰建
後幢題閏正月壬寅朔乙巳四月建正月置閏亦近
歷所少

張行久造像記

清泰元年五月

右張行久造像記在益都縣大尹村三官廟行久結
銜稱平盧軍節度同經畧副使時爲平盧軍節度使
山左金石志攷爲房知溫碑寫菩薩作落薩亦異文
後晉

贈太傅羅周敬墓誌銘

天福二年十月

右贈太傅羅周敬墓誌銘在洛陽縣周敬爲梁天雄
軍節度使羅紹威子碑稱紹威四子長延規次周翰
次周敬次周胤周翰義成軍節度使甲戌七月薨遂
命公權知滑州軍州事滑州卽義成軍舊五代史羅
紹威傳紹威子周翰繼爲魏博節度使通鑑考異引
梁功臣傳云周翰起復雲麾將軍充天雄軍節度留
後尋檢校司徒正授魏博節度使魏博卽天雄軍天
雄義成本同爲羅氏所有故碑稱命公權知滑州軍
事十一月授宣義軍節度使舊史云命爲兩使留後
尋正授旄鉞蓋并天雄義成爲一軍也

聖字山崆峒巖記

天福五年七月

右聖字山崆峒巖記在鳳臺縣記稱僧善閉崆峒人也崆峒是鄉鎮以巖而得名又稱城皇信衆皇通作隍城隍猶今言城內碑異文葺作葺冥作冥朽作朽袁作袁錢氏未舉

佛頂尊勝陀羅尼幢

天福六年七月

右佛頂尊勝陀羅尼幢在益都縣西門內呪後有記稱廟臨澠水又有東西兩廟勅贈將軍等字可辨其云廟主大王者卽平盧軍節度使也題名結銜有散都頭押衙副知客衙前樂營使弓箭第四都十將都壕寨使牽攏軍使等名皆不見于史唐末官制之濫押衙得虛兼銀青光祿大夫太子賓客等銜至此幢

都虞候稱忠勇□衛功臣散都頭稱□□□功臣
其濫更甚矣又有新婦新孀女弟子諸稱亦惟唐末
碑有之

後周

雲門山功德記

廣順三年十月

右雲門山功德記在益都縣記後有吳越國前攝金
吾衛引駕長史彭仁福等四人題名記云清信弟子
彭仁福本貫浙江寓居海岱因安賜履未返三吳前
幢亦有吳越鎮海軍討擊使顧承威皆以吳越國人
而流寓于青齊者

佛頂尊勝陀羅尼經幢

廣順三年十二月

右佛頂尊勝陀羅尼經幢在修武縣記云羅漢邑衆
壹拾陸人維那旧景儒羅漢邑當是鄉鎮之名

衛州刺史郭進屏盜碑顯德二年五月

右衛州刺史郭進屏盜碑在汲縣郭進宋史有傳亦
見東都事畧稱其爲登州衛州刺史翦除羣盜爲洛
州團練使有善政吏民皆請立碑詔近臣撰文賜之
此則其一也

濟州刺史任漢權屏盜碑顯德二年閏九月

右濟州刺史任漢權屏盜碑在鉅野縣碑稱皇朝建
濟州於鉅野縣舊五代史地理志周廣順二年九月
以鄆州鉅野升爲濟州其地望爲上割兗州任城中

都單州金鄉等縣隸之至其年十二月又割鄆州鄆城縣隸之中都縣郤歸鄆州故碑又云濟新造之郡也漢權以顯德元年十月牧濟二年閏九月郡將官吏詣闕上請詔左拾遺李昉撰此碑在到任後一年

龍泉禪院記 顯德三年九月

右龍泉禪院記在陽城縣前記爲澤州司法叅軍徐綸述乾寧元年建院勅額之由末題大周開基之二載歲直壬子蓋廣運二年也記後有鄉貢進士王獻可後序述大周承祧之二祀凡曰梵宇悉去無名是院以有乾寧賜額得存舊五代史顯德二年五月甲戌詔諸道縣鎮村坊應有勅額寺院一切仍舊其無

勅額者並仰停廢碑所述與史合

中書侍郎景範碑

顯德三年十二月

右中書侍郎景範碑在鄒平縣土人謠爲晉景延廣
顧亭林作記辨之景範舊五代史有傳碑稱長山之
下淄濬爲州地勝氣清口公故里本傳亦云景範淄
州長山人今則割入鄒平縣矣

大岬山寺准勅不停廢記

顯德六年七月

右大岬山寺准勅不停廢記在濬縣記末題大周顯
德五年歲次戊午大周顯德六年歲次己未七月末
日寅時建稱大周顯德五年是其作記之年稱顯德
六年是其立碑之日記後題前黎陽發運使銀青光

祿大夫檢校工部尚書兼御史大夫上柱國孫郃郃奉化人天祐間左拾遺有卜世論春秋無賢臣論見唐文粹

南唐

茅山紫陽觀碑

右茅山紫陽觀碑在句容縣碑已殘毀僅存片石四十餘字此舊拓本止缺十七字洵可寶也碑末題己未歲十二月一日建己未爲周顯德六年史稱南唐去帝號奉周正朔以此碑證之時止去帝號而已碑爲徐鉉奉制撰騎省集中有此文碑則格天光表集表作被式嚴觀律之場集律作物由是靈符綵集集

緣作總承積德之基集積作績皆當以碑爲正

本業寺記

右本業寺記在上元縣僧契撫撰東山任德筠書記
稱保大五年蒙先元宗皇帝御批奉功德使齊王承
省司給牒重賜開基元宗皇帝者南唐嗣主璟齊王
者烈祖第四子景達元宗之母弟也末題時唐乾德
五年歲次丁卯七月十九日建乾德爲宋太祖卽位
之八年時李煜奉宋年號而自題其國曰唐

北漢

天龍寺千佛樓碑

廣運二年八月

右天龍寺千佛樓碑在太原縣新五代史劉旻傳契

丹冊尊旻爲大漢神武皇帝舊五代史作契丹僞冊
爲英武皇帝此碑英武皇帝凡三見是新史誤也碑
稱承鈞爲睿宗皇帝亦新史所不載